

葉天寥年譜

三



甲行日注卷五

茗香客衲木拂簾

丁亥正月初一日癸卯元旦卽立春也微雨卽晴率兒輩往聖恩寺辭諧孟韓公嚴亦至同見剖石師於禪室中藻稅精美左掛畫塔一株塔書法華品七卷字如芥子佛字卽在中閒佛頂上菩薩字卽在兩旁菩薩頂上人巧天工相錯不知創始何時趙松雪爲摹出此又臨松雪本也松雪本今在揚州右供古大士像李次德筆亦甚高妙茂申仲日來又楊維斗來有蔣仲雄同在工詩詠薙髮云萬事已疏圓半頂百年未艾老爲童無不絕倒也

按順治三年十二月除夕立春魯監國二年元旦立春先生用監國歷不用大清歷也

初二日甲辰陰大風沽酒稍作山中主人

初三日乙巳甚冷早有飄雪卽晴大風飲顧仲熊齋予
白云望氣者見鄧尉山頂有紫雲如蓋當是佛法之
瑞萬峰故時有紫雲樓

初四日丙午晴遷茗香菴

初五日丁未雨飲顧太沖家暮大雨

初六日戊申大雨

初七日己酉晴冷大雨風過子立非齋崑山王淑士園
亭也夜止宿

初八日庚戌晴訪吳茂申於顧筍洲亭小坐置酒留飯
游碧峰山五雲洞宏廓窈窕按剔石窟頓成名勝固

是筍洲之巧未免人工過多雕鑿補綴痕迹歷然夜
飲公玉家止宿

初九日辛亥晴訪諧孟公嚴三關上人飲絅尙家沈留
侯君山來一語卽去

初十日壬子雷大雨竟日全和除夕元旦詩云昔日雄
心恨不除萍蹤又過一年虛霜高人度陽關外日暖
花看漢臘餘山異羅浮傳綵蝶藥無王母餌瓊魚靈
均空有行吟怨憔悴江潭未卜居一共欣物候再逢
春遊子情悰竟未新每念柏觴渾欲倦自甘藿食豈
嗟貧兩年望遠王正月三度悲添世老臣獨有五噫
高士恨今朝難問頌椒人二侗亦和云北風吹臘去

庭除寥寂無情望碧虛九轉暗驚疑隔世珠流到盡
憶三餘鄉思怯夢非如蝶內熱懷冰欲化魚憔悴一
年已送晚慵將殘燭守窮居一梅開猶帶漢時春澤
國江山歎未新同學輕肥誰不賤獨驕巖穴自長貧
靈均旣放經三載重耳從亡愧五臣冉冉修名空怨
暮屠蘇讓盡少年人二

十一日癸丑晴顧太沖來袖出和篇云收拾窮愁餞歲
除幸從貸寶瓮中虛搔頭帽髮羞看短插膽瓶花喜
供餘梅塢不賒千日酒桐江還釣五湖魚經年山曠
吳儂面相識無過只此居一漢家無歷不知春依舊
江山國號新北地鼠狼皮莫貴南陽龍虎首皆貧聞

風起海甘遺老臥雪埋山自放臣爆竹聲驚雙鬢客
屠蘇酒醉六朝人二適仲日和什亦至云歲事俄驚
此夕除火盆破臘小庭虛樽前花萼烏囀後鏡裏芙
蓉鶴舞餘喜見班荆趨鐵馬愁攀叢桂問金魚買山
深愧巢由處碧柳新栽更卜居一剛逢三月滿三春
百歲欣看屬再新似筆木花班掾老如錐細草馬卿
貧擎來日月雲臺客留得煙霞草莽臣一醉屠蘇梅
信近折枝相贈慰佳人二

十二日甲寅晴冷辭韓同來諸孟見仲日和余初度詩
亦次韻云歸鴻不忍問吾廬休詫遼陽尙未墟溪雨
頻沾移架帙山香初習過籬裾經旬不見惟詢藁快

事纔吟怯授書我更悠悠路車感與君同賦夜窗虛
一漠漠梨雲夢不迷側身天地久幽棲燎衣客話滹
沱北磨楯軍傳灞產西湯餅封胡自開讌雞豚社火
亦聞輦啓函試詠滄浪句聾酒將斟合耳提二諧孟
自次仲日故有悠悠路車之語別去過仲日倅偕
行仲日留辭招余適佺侗自青芝山來遂俱往潭東
茂申予白亦不期至迨暮茂申佺侗以路遠先別吾
輩後散辭韓仲日又復過茗香菴翦蔬醢汁坐語更
餘俱止宿

十三日乙卯晴暖景色明麗梅梢半已放白矣

十四日丙辰晴暖石壁菴慧圓上人來

十五日丁巳晴暖往舊館折梅花一大枝奇峭古拙崇
孫又覓得紅梅花水仙花同插瓶中空山蕭寂晚步
庭階深負明月

十六日戊午雨水晴暖姪孫雲奕來餽以一金

十七日己未晴暖楊維斗來又元長上人至

十八日庚申陰風夜雨

十九日辛酉陰冷旃來午後風雨

二十日壬戌風雨大雪冷甚

二十一日癸亥晴冰異冷

二十二日甲子晴余同年賀公調

名鼎丹陽人

忠勞任事以

蜚語死詔獄家貧喪妻子余所知也頃諧孟云公調

曾聘繼夫人■氏未及娶被逮至今矢節終身真可
憐感也夫爲臣而以忠死爲女而以節老天下扼腕
傷心之事何可道哉

二十三日乙丑陰冷往石壁菴三面皆石止一片如斧
削就南瀕太湖菴藏壁圍中景曠地僻遠眺茗雪諸
山猶有殘雪掩映二峯在目亦一快覽也吳茂申趙
締之亦僧服來不值

二十四日丙寅陰冷慈覆上人來云上世卽黃金紫公
名挺宋眞宗時人和豐黃亦勩於宋鐵山瓊禪師居此
石霜圓法嗣也管東溟先生於地中掘得菴碑故復
建之菴猶有瓊遺像五鐙不載

二十五日丁卯晴暖顧端木大鴻自崑來往候之以侯

雍瞻記原研德智含所和忠烈詩見寄雍瞻智含又

俱有酬答之什但與諧孟并耳雍瞻云從蜀大畜有

餘天堪笑空中習舞聯春色還人應有分五中置子

待何年

注云自寓

葉公今見真龍好米老遙看拜石眠

諧孟

隱名

怪底青山餘瘦骨羊何滿篋和歌篇

名岐

智含

云曲江騎馬共朝天白下官曹幾接聯辭賤子已成

懷舊賦通家頻話定交年薛公賣酒休長隱水部看

梅省醉眠會有中興訪遺佚憑將閒氣入詩篇

名立

公季子也

端木留飲因談秦中有異僧能爲李少君

之術不必隔帷望也可以覲面晤言韓城衛帶黃

名景

瑗乙丑進士撫大同殉難

公子年二十餘喪偶其閨人才色兩絕

公子思不能置僧爲招魂昏夜冉冉而至相去二三

尺姿容灼然聲語明皙竟夜對談五更影漸淡不見

二十六日戊辰晴登茶山看梅花如綠雲覆雪

松梅相錯

二十七日己巳晴與倌偕閑步西蹟山下立湖汊石上

遠望悠然山行盡日不逢人裊裊野梅香入袂此景

似之

坡公詩

二十八日庚午晴諧孟遺惠山酒二罈顧敬修來

二十九日辛未陰風趙欽仲來僧服

二月初一日壬申晴顧大鴻和初度云遠山入望似匡

廬煙景依依陶令墟覓句盡凌長慶體聞香猶識建

章裾棲遲祇樹翻唐譯顧盼雲臺讀漢書古幹空山
鱗未老天南雨露不教虛一瞻烏莫歎路長迷今日
東山只暫棲酒國巧當竺國裏書城應在化城西喜
推赤伏尊圖錄怒檄黃龍贊鼓輦會見詔求工部集

新詩開卷記招提

二名天達
端木長子

初二日癸酉驚蟄冷甚大風雪抵暮雪止寒更劇薛惠
酒已罄村醪如水下酒止一乳餅又冷物也借得豆
少許炒之忽聞扣門聲則仲熊致字倌僮云雪中覓
得一野鴨招共食之時天已暗積雪在塗故兩兒謝
不赴然仲熊夜情深念友矣夜大風及曉

初三日甲戌晴大風冷甚雪半消日中復飄飄集也顧

端木和初度四首云茫茫天地任蘧廬喬木森森映
古墟閉戶不聞長者轍焚香獨攬化人裾行藏夙世
金門隱哀樂中年午夢書牘有壯心降不盡悲歌明
月動窗虛一世路於今七聖迷不關徧性且幽棲杖
挑風雪皋亭外幙捲煙波震澤西觀象五雲晨演易
談兵八陣夜謹輦慚余孤負梅花約紫陌青樽只自
提二空山高臥卽吾廬暗有龍光在斗墟薊北已殘
周禮樂江南誰憶晉簪裾家餘涕淚陳情表坐待圍
碁破敵書海上稍聞消息近試拈詩筆欲凌虛又三
朝朋舊事多迷流落孤臣好共棲物色夷吾江左右
謳歌建武漢東西閑成春草池邊句度入寒風塞上

輦翹首日南新詔下公徒十萬待親提

又

夜宿僊偶

留仲日處煑菜獨酌淒情可掬

初四日乙亥晴與僊僊逾銅井山嶺登嚴文靖公墓至
金魚澗訪趙欽仲已往龍池矣返從西磧之北內窰
外窰松梅桑柘組織相錯杏花猶未折也登斗柄石
鼓突橫亘北望晉陵陽羨諸山微黛朧朧如抹天上
不能分明湖平如鏡清光灩澦漁艇百帆欲遠欲近
返茗香十里餘矣

初五日丙子晴登妙高峰崎嶇蘄絕不勝攀躋之困峰
頂坦平松陰數畝元長築靜室松閒名古德雲詩屏
畫壁花牀茶榻精潔素雅庭中老梅叢桂疏篁細篠

參差有致具區泓然浮環檻外聖恩寺後大二峰石
天然靈妙恨無辨才如風篁嶺淬洗出之則一山盡
然矣朱勔欲進花石綱而石根連太湖直接洞庭故
不能動也還至青芝山斜日落矣佗沽酒留端木父
子共談往事端木云乙酉秋間崑山婦女少艾不辱
節投水者四百餘人

初六日丁丑晴午集侗寓夜飲徐慶宇家

初七日戊寅晴暖訪黃金紫公墓不得有二石人臥埋
土中云卽是也半崖一松高大奇古宋元祐至今矣
然第三本也其二夭矯尤異風折土人薪焉慈覆繪
藏之亦祇圖其一本

初八日己卯晴往圓照菴相去咫尺菴主靜明頂月法
屬也聞虜在浙所掠婦女卽鬻郡中徽人以五十金
買一少婦大有姿色又一處子索價五百金未有所
主傷矣哉

初九日庚辰晴風辭諧孟作余小像贊云或驚退之雲
衲或疑子瞻雪髯風骨何慚二老嗟逢天寶建炎余
何敢當之初畫成頂笠執杖適有山鄰見之曰此韓
文公也眾皆輟然端木云世傳藍關圖本實類此諸孟妙用也

初十日辛巳曉雨午晴

十一日壬午晴吳子方來

十二日癸未微雨烈風端木招同茂申小集往赴之道

上杏花初放如美人新粧濃淡之間妙極妖麗恨封
家姨太不護惜耳

十三日甲申晴

十四日乙酉晴

十五日丙戌晴

十六日丁亥陰冷夜大雨

十七日戊子雨冷

十八日己丑春分晴冷

十九日庚寅晴顧端木拉往二窰看杏花稍爲風雨殘
矣有數百樹茅檐村舍雞鳴犬吠俱在杏花內畫景
天成相對思酒甚村無帘市土人引至一菴中飲茶